

## Tutu ñaovi ña nita ta Pedro ña tiví ra kua'an nda'a nivi na kándixa Jesucristo

*Ta Pedro tiví to'on yó'o*

*kua'an ña chindeé ra nivi na kándixa Jesucristo*

<sup>1</sup> Yi'i, ta Simón Pedro, ñii taapóstol ta kisa chiño noo Jesucristo kúu. Ta táa i tutu yó'o xaa ña nda'a ndó'ó, nivi na xa ñaki'in ñava'a ña livi, ña ndáya'ví ní, ña kúu ña ndáa ini ndó Ndios ndatán ndáa ini mji ndi Ndios. Ta vitin xa ñaki'in yó ñava'a yó'o, chi ta tãnda kúu Jesucristo, ta Ká'no noo yó, ta kúu ra Ndios, Ta ta Saka'ku mji yó. <sup>2</sup> Xa'a ña vivíi xini ndó Ndios ta vivíi xini ndó Jesucristo ta Ká'no noo yó, ná ke'é Ndios ví'í ní ka ñava'a xí'in ndó, ta ná taxi ra ñava'a koo ini ndó. Ta ná kutú ndaa ini ndó xí'in ndi'i ñava'a yó'o.

*To'on yó'o ká'an xini ñó'ó kutaku yó*

*ta kasa ndivi yó ndatán kóni Ndios*

<sup>3</sup> Ta Ndios xí'in ndee ra, xa taxi ra ndi'i ña xini ñó'ó yó ña va'a kutaku yó noo ra ndatán káchí ini mji ra. Xa ñaki'in yó ndi'i ñayó'o chi vitin ndino'o ini yó xini yó Jesucristo, ta kúu ta ta ñakana mji yó ña nduu yó nivi na kukomí ñava'a ña livi ká'no ña kúu ña kómí mji ra. <sup>4</sup> Ta taxi ka ra kua'a ní ka inka ñava'a ná'no nda'a yó, ña kúu ña ndáya'ví ní, chi ñii ki'va ndatán yóo ña ñika'an ra kasa ndivi ra, saá kisa ndivi ra ña. Ndios taxi ra ñava'a yó'o nda'a ndó ña kuu ndó sa'ya ndino'o ra ta nduu ndó ndatán yóo mji ra. Ta saá kuchiño ndó kuxíká ndó noo ña on vá'a ñoyívi yó'o, chi nivi ñoyívi yó'o ké'é na ndi'i saá noo ña on vá'a ña kúu ña káchí ini mji na. Chi ña on vá'a ké'é

n̄ivi yó'o vaxi kua'no ka ña, ta sáti'vi ña m̄i na ta saá sáti'vi ña inka n̄ivi. <sup>5</sup> Ndó'ó n̄ivi na kándixa Jesucristo, x̄ini ñó'ó chikaa ndó ndee x̄i'in m̄i ndó ña vivíi kutaku ndó ta va'a kasa ndivi ndó ña kóni Ndios. Saá tuku chikaa ndó ndee ña koni va'a ka ndó Ndios. <sup>6</sup> Nasita x̄i'in m̄i ndó ña on ke'é ka ndó ña on vá'a; kundeé ini ndó x̄i'in ña xó'vi ndó, ta on sandakoo ndó ña ndixa ndáa ini ndó Ndios. X̄ini ñó'ó taxi x̄i'in m̄i ndó ña kutaku ndó ndatán káchí ini Ndios. <sup>7</sup> Ndixa kuki'vi ini ndó koni ndó natá'an ndó na kándixa Jesucristo, ta saá kuki'vi ini ndó koni ndó ndi'i n̄ivi.

<sup>8</sup> Tá ké'é ndó ndi'i ñava'a yó'o, ta ndi'i saá kivi chikaa ndó ndee ña kua'no ka ndó x̄i'in ñayó'o noo Ndios, ta saá nduu ndó n̄ivi na kisa ndivi chiño ña ndáya'vi ní, ta saná'a ndó ndí on sivi ña manj kúu ña x̄ini va'a ndó Jesucristo, Taa taKá'no noo yó. <sup>9</sup> Tá yóo n̄ivi na kándixa Jesucristo, ta on vása kisa ndivi na ndi'i ñava'a yó'o, ta saá n̄ivi yó'o táku naa na, ndatán táku n̄ivi nakuáá nduchū noo, án na lo'o chíin kuiti va'a x̄ito nduchū noo. Saá chi n̄ivi yó'o xa nandoso na ndí Ndios kisa ká'no ini ra xa'a kuachi ke'é na ta xa ndasa ndii ra na noo ra. <sup>10</sup> Ñakán, nañani yó x̄i'in náki'va yó, chikaa ndó ndee x̄i'in m̄i ndó ña kua'no ka ndó x̄i'in ñava'a ña ké'é ndó, chi ñayó'o sáná'a ña ndí ndixa Ndios nakaxin ra ndó'ó ta kana ra ndó'ó kúu ndó naño m̄i ra. Chi tá saá ké'é ndó, ta nda ñii kivi on nakava ndó noo ña on vá'a ña taxi sandakoo ndó ña kándixa ndó Jesucristo. <sup>11</sup> Ta saá Ndios x̄i'in ñasij ini ra taxi ra ki'vi ndó noo xá'nda chiño Jesucristo ndi'i saá kivi ña vaxi. Ta Jesucristo kúu Taa taKá'no noo yó ta kúu ra Taa ta Sákaku m̄i yó.

<sup>12</sup> Ta saá nda ñii kivi on sandakoo i sanaká'an i ndó'ó xa'a ndi'i ñayó'o, vará ndó'ó xa x̄ini ndó ta ndino'o ini ndó kándixa ndó ñandaa ña nákaa táku ini ndó vitin. <sup>13</sup> Tá ña táku ka i, chiño noo i kúu ña sanaká'an i ndó'ó xa'a ndi'i ñandaa yó'o, <sup>14</sup> chi Jesucristo, taKá'no noo yó, taxi

ra ña kúnda*a* ini *i* ndí *y*ach*i* ní kixaa ña kivi *i*. <sup>15</sup> Ta xa'a ñayó'o chíkaa ní *i* ndee xí'in m*i* *i* ña viví saná'a *i* ndó'ó ndí'i ña xíni ñó'ó xa'a ña ndasaá va'a kutaku ndó ndatán kóni Ndios, ta saá tá xa nixi'i *i*, ta ndó'ó nda ñii kivi on nandoso ndó to'on yó'o.

*To'on yó'o ká'an xa'a ñalivi ña ká'no kómí Jesucristo*

<sup>16</sup> Tá kivi saná'a ndi ndó'ó ña kunda*a* ini ndó xa'a ña ndikó tuku Jesucristo ñoyívi yó'o xí'in ndí'i ndee ra, ta on vása ní-ka'an ndi xí'in ndó to'on livi ña kaku sin*i* nivi ñoyívi yó'o. To'on ndixa kúu ña ndákuiin ndi xa'a ra, chí xí'in nduch*u* noo ndi xini ndi ñalivi ká'no ra ta xini ndi ndí'i ndee ra. <sup>17</sup> Xini ndi ndasaá Ndios Yivá yó taxi ra ñato'ó ká'no nda'a Jesucristo, ta taxi ra ña livi ká'no náye'e ra noo ndi, chí nda noo livi ní yé'e ñoyívi ñino kixi to'on ña nika'an, káchí ña saá: “Tayó'o kúu Sa'ya *i*, ta kí'vi ní ini *i* xini *i*, ta kúsij ní ini *i* xini *i* ra”, káchí Ndios. <sup>18</sup> Xini so'o ndi to'on yó'o, ña kee ñoyívi ñino kúu ña, saá chí ñayó'o xikuu ña kivi nixa'an ndi nixiyo ndi xí'in Jesucristo noo yuku síkón ña kúu yuku y*i*.

<sup>19</sup> Ta saá ndixa kúnda*a* ini yó ndí to'on ña ndato'on naprofeta xina'á kúu ñanda*a*. Ta va'a ndixa chikaa so'o ndó to'on ña nika'an nayó'o, saá chí to'on yó'o chindeé ña ndó'ó. Ta to'on yó'o yóo ña xí'in ndó ndatán yóo ñii ño'o ña tóon ndiníí ñoo anda kixaa ña t*i*vi xitaan ta keta kimi tí tóon. Ta ndatán yóo kimi tí tóon xitaan, saá yóo Jesucristo, chí sánaye'e ra ini yó, ta táxi ra ña kunda*a* ini yó ñanda*a*. <sup>20</sup> Xíni ñó'ó ní kunda*a* ini ndó ñayó'o: nda ñii nivi on kúchiño na nandaxin mató'ón na xí'in sin*i* m*i* na, án ndatán káchí ini m*i* na, to'on Ndios ña ñitaa naprofeta xina'á. <sup>21</sup> Chi to'on ña nika'an naprofeta on vása ní-kaku ña sin*i* m*i* na án níma m*i* na, saá chí Níma Ndios nika'an to'on yó'o ini naprofeta ña nika'an na ña xí'in nivi, ndatán kóni Ndios.

## 2

*Tò'on yó'o ká'an xa'a nataa na sáná'a tò'on Ndios  
ña xa nasama na  
(Judás 4-13)*

<sup>1</sup> Tìxin nañoo Israel kuiya xina'á nixiyo naprofeta na on vása ní-ka'an ndoso tò'on ña ndaa ndatán yóo ña nika'an Ndios, chi nasama nayó'o tò'on Ndios ndatán káchí ini mji na. Ta ñii ki'va saá kixaa kivi ta nakuita nataa tixin ndó'ó, ta nayó'o saná'a na tò'on ña vatá xa'a Jesucristo. Nataa na on vá'a sáná'a yó'o kata ní'nó na tò'on ña nasama na, ta saá sandá'ví na nivi na koni so'o ña saná'a na, nda tondaa na ka'an na ndí on vása kándixa ka na Jesucristo, vará kúu ra taa ta nixi'i xa'a ña sakaku ra na. Nataa na sáná'a ña on vá'a yó'o ndíso ní na kuachi, ta Ndios taxi ra ñii kama kixaa ña sandi'i xa'a na. <sup>2</sup> Ta kua'a ní nivi kasa ndivi na ndi'i noo ña on vá'a xí'in ñakini, ndatán yóo ña táku nataa na sáná'a yó'o. Ta inka nivi na on xiin kandixa Jesucristo koto na ña on vá'a ké'é nataa yó'o, ta saá ka'an ndiva'a na xa'a yichi ña ndaa. <sup>3</sup> Nataa na sáná'a ña on vá'a ndasaá kuiti kúsii ní ini na ña naki'in na kua'a ní si'un ndó xa'a ña sáná'a na ndó'ó ña káchí na kúu tò'on Ndios, ta kúu ña tò'on ña nasama mji na. Xa xina'á ní Ndios chítóni ra kasa nani ra xa'a ña on vá'a ké'é nayó'o, ta ndixa saá kundo'o na kivi ña vaxi.

<sup>4</sup> Chi Ndios on vása ní-kisa ká'no ini ra xa'a naángel na niki'vi kuachi xina'á, ta sakana ra na kua'an na ndaya, ta nó'ni na ñó'o na noo naa, ña ndátí na anda kixaa kivi ña kasa nani ra xa'a ndi'i kuachi. <sup>5</sup> Ta ndixa Ndios ni-kisa ká'no ini ra xa'a nivi na xitaku ñoyívi yó'o kuiya xitaku taNoé xina'á. Ta taNoé nika'an ndoso ra xí'in nivi yó'o ndasaá vivíi xini ñó'ó kutaku na ndatán kóni Ndios. Ta nivi yó'o ni-xiin na chikaa so'o na tò'on Ndios, ta saá Ndios sakoon ra savi na'á sata nivi yó'o, ta nixi'i ndi'i na, ta Ndios sakaku ra ndasaá kuiti taNoé xí'in uxá nivi. <sup>6</sup> Saá

tuku Ndios kisa nani ra xa'a kuachi nivi nañoo Sodoma xí'in nañoo Gomorra, sandi'i ra xa'a na xí'in ño'o xixi ña kee ñoyívi nino, nixixi ndi'i ñoo na xí'in ndi'i mji na anda nduu ndi'i ña nixixi yó'o yaa kuiti. Ñayó'o kúu ña sáná'a ndasaá kini ní kundo'o nivi na ndiva'a ini. <sup>7</sup> Ta Ndios sakaku ra taLot ña ni-xixi ra ñoo Sodoma, chi tayó'o xikuu ra ñii ta ta va'a ini, ta nita'vi ní ini ra xini ra ndi'i ña on vá'a ñakini xitaku nivi ñoo yó'o. <sup>8</sup> Taa ta va'a ní ini xikuu ra, ta ñii ñii kivi niya'a yo'vi ní xitaku ra ñoo Sodoma, chi xito ra ta xini so'o ra ndi'i noo ña on vá'a ké'é nivi yó'o. <sup>9</sup> Ndi'i ña ké'é Ndios xí'in nivi sáná'a ña ndi xini ra ndasaá chindeé ra nivi na chikaa so'o to'on ra, ña sakaku ra na noo ndi'i ña yo'vi xito ndoso ña'á. Ta ñii ki'va saá, xini ra ndasaá saxo'vi ra nivi na ké'é ña on vá'a, ta ke'é ra saá xí'in na kivi kixaa ña kasa nani ra xa'a kuachi ndi'i nivi.

<sup>10</sup> Ta Ndios saxo'vi ka ra nivi na táku kisa ndivi ndi'i ña on vá'a ñakini ña kútoo yiki koñu mji na, saá chi nivi yó'o nda lo'o on xijn na chikaa so'o na to'on xá'nda chiño Ndios noo na. Ta nataa na sáná'a to'on Ndios ña nasama mji na, só'ó ní na, on vása táxi na xí'in mji na ña koni so'o na ñandaa. Ta kúu na nivi na ña'a ní ini, ta káchí sini mji na ndi kómí na ndee ká'no ka, ta ni on vása yí'vi na kándiva'a na xí'in ndee ná'no ka noo na. <sup>11</sup> Ta naángel, na yóo noo Ndios, vará kómí ka na ndee noo nataa yó'o, ta naángel yó'o on vása xijn na ka'an na to'on ña kándiva'a xa'a inka ndee ná'no.

<sup>12</sup> Ta nataa on vá'a yó'o ndatán táku kití títukú táku na, chi kití yukú yó'o ndasaá kuiti táku rí kisa ndivi rí ndatán kóni níma mji rí. Ta títú'o kaku rí xa'a ña tiin nivi rí ta ka'ni na rí. Ta ñii ki'va saá kundo'o nataa on vá'a yó'o, chi nayó'o ká'an na to'on ndiva'a xa'a ña on vása kúndaa ini na, ta ndatán ndi'i xa'a kití yukú, saá ndi'i xa'a na. <sup>13</sup> Ta nataa on vá'a yó'o, kixaa kivi ña naki'in na ya'vi na xa'a ña on vá'a ké'é na ña táxi xo'vi inka nivi. Xí'in ñasii ini

na ké'é na ndi'i noo ña kútoo yikí koñu na, on koó ñato'ó kómí na, ni on vása násita xí'in mji na noo ña ké'é na ndi'i ña on vá'a, vará ndiví xíto ka nivi kúu ña. Ta kivi nataa on vá'a yó'o xixi na xí'in ndó noo yóo viko noo nákutá'an ndó'ó na kúu na kándixa Jesucristo, ta ña ka'an ní noo kúu ña xíto ndó ñakini ké'é nataa yó'o.

<sup>14</sup> Ta nataa on vá'a yó'o, ndi'i násí'í ná xíto na noo, ta kútoo ní na ki'vi na kuachi ñoyívi xí'in ná. Nda ñii kivi on vása sándakoo na kí'vi na kuachi ña kúu ña kútoo ní yikí koñu mji na. Ta chú'u na nivi na lo'o ní kándixa Jesucristo ña ké'é na ña on vá'a. Nataa on vá'a yó'o on vása xaa ini na xí'in ña xa kómí na, ta ndi'i saá kivi kóni na kukomí na ndi'i ña káchí ini mji na. Nataa yó'o ndíso na chi'ña xa'a ña on vá'a ké'é na, ta Ndios taxi ra ko'on na noo xo'vi ní na. <sup>15</sup> Nataa yó'o xa sandakoo na yichi ndaa, ta naki'in na ndikon na kua'an na yichi taprofeta Balaam ta ta xitaku xina'á, tayó'o xikuu sa'ya taBeor. Saá chi taprofeta yó'o kutoo ní ra ki'in ra si'un xa'a chiño on vá'a ké'é ra. <sup>16</sup> Ta saá kee ra kua'an ra ña satavi chi'ña ra naño Israel, ta ni-kuchiño ra, chi ñii tiburra, kití tí on vása xini ka'an to'on kúu rí, ta tíyó'o nika'an rí to'on xí'in ra, ta xí'in ña nika'an rí sasi rí noo ra, ta ni-kuchiño ra kasa ndivi ra chiño kí'ví ña kua'an ra ké'é ra.

<sup>17</sup> Nataa on vá'a yó'o yóo na ndatán yóo pozo yichí ña on koó takuií kómí, ta yóo na ndatán yóo viko ña sándachí tachí na'á kua'an ña noo chinda'á tachí yó'o ña. Ta Ndios kasa nani ra xa'a nataa yó'o, ta ti'ví ra na ko'on na noo naa ní ña xo'vi na ndi'i saá kivi. <sup>18</sup> Nayó'o kua'a ní chinóo na noo to'on ká'an na, ña sanoo na ini nivi ña kandixa na ña sáná'a na, ta to'on vichí ña on vása ndaya'ví kúu ña sáná'a na. Ta xí'in to'on yó'o chú'u na nivi na sakán sandakoo yichi on vá'a, ña tuku ké'é nayó'o ña on vá'a ña kútoo ní yikí koñu na. <sup>19</sup> Ta nataa on vá'a yó'o ká'an na, káchí na saá: “Tá kundikon ndó sata ndi, ta saá kuu ndó nivi na

kaka ndíkà ñoo ndayí, ta saá ñon koó kà ña xá'nda chiño ñoo ndó”, káchí na. Ta mji nataa yó'o kúu ñivi na nó'ni kútu xí'in ndi'i ñoo ñakini ta xí'in ndi'i ñoo ña ñon vá'a ké'é na. Saá chi tá ñii ña ñon vá'a kúndeé ña ñoo ñivi, ta ña ñon vá'a yó'o kúu ña xá'nda chiño ñoo ñivi yó'o. <sup>20</sup> Yóo ñivi na xa kundaa ini to'on va'a xa'a Jesucristo Taa taKá'no ñoo yó ta sandakoo na yichi ña ñon vá'a ñoyívi yó'o. Ta saá, tá ñivi yó'o ndikó koo tuku na ta kixá'a na naki'in na yichi ñon vá'a, ta tuku taxi na ña xá'nda chiño ña ñon vá'a ñoyívi ñoo na, ta saá ñivi yó'o kuiso kà na kuachi ñoo ña xindiso na si'na. <sup>21</sup> Va'a ní kà, níkúu, tá nda ñii kivi ni-kundaa ini na xa'a yichi ña ndaa, saá chi xa'a ña kundaa ini na yichi ña ndaa, ta sandakoo na yichi yó'o, ta ña ke'é na saá Ndios ndeé ní kà saxo'vi ra na. <sup>22</sup> Ta xí'in ña ke'é ñivi na ñon vá'a yó'o saá, táxi na ña kundaa ini yó ndí ña ndíchí ká'an to'on ña káchí saá: “Tí ina ndíkó tuku rí kaxi rí ñakini nduxan rí.” Ta inka to'on ndíchí káchí saá: “Tíkiní sakán chichi rí xí'in takui ndii, ta tuku ndíkó rí sakuchu xí'in mji rí nda'yi kini”, saá káchí to'on ndíchí.

### 3

#### *To'on yó'o ká'an xa'a Jesucristo ndikó ra ñoyívi yó'o*

<sup>1</sup> Nañani yó xí'in náki'va yó, na kí'vi ní ini i xíni i kúu ndó, ñayó'o kúu tutu ovi ña táa i xaá nda'a ndó. Ta xí'in ña ovi tutu yó'o saá sánaká'án i ndó'ó ña ndixa xíni ñó'ó kani siní ndó xa'a ñava'a ña kúu ñandii ndino'o. <sup>2</sup> Kóni i ña naká'án siní ndó to'on Ndios ña nika'an ndoso naprofeta kuiya xina'a. Saá tuku kóni i ña naká'án siní ndó ndayí ña xa'nda chiño Jesucristo Taa taKá'no ñoo yó ta sakaku mji yó, chi mji ndi naapóstol saná'a ndi ndó'ó to'on yó'o.

<sup>3</sup> Ña si'na kà xíni ñó'ó kundaa ini ndó kúu ña ndasaá koo tá xa kuyatin vaxi kivi sondí'í. Chi kivi saá kutaku ñivi na kutoo ní ke'é ndi'i ñoo ña ñon vá'a ña káchí ini mji na, ta

kusiki na nivi xá'a ña kándixa na Jesucristo, <sup>4</sup> ta ka'an na xí'in na, ndaqa to'on ña'á na, kachí na saá: “¿Míkíá yóo Jesucristo ña kasa ndivi ra to'on ra ña nika'an ra xí'in ndó, ndikó ra ñoyívi yó'o? Chi xa nixi'i va yivá si'í yó, ta tá káa ka va ñoyívi yó'o, ndatán káa ña kivi noó xina'á, ñii kí'va saá káa ña nda kivi vitin”, kachí na, kusiki na nivi na kándixa Jesucristo kivi saá. <sup>5</sup> Nivi na kusiki yó'o on xijn na kandixa na ndí Ndios xí'in to'on ña nika'an ra kisa va'a ra ñoyívi yó'o ta kisa va'a ra ñoyívi nino. Ta noo yóo ku'a ni takuí mini, ta nika'an Ndios ta kana ño'o yichí tixin takuí yó'o, ta saá takuí yó'o xino nduu rá ña. <sup>6</sup> Ta saá kivi xitaku ta Noé, ta Ndios xa'nda chiño ra noo takuí ta sakoon ra savi na'á, ta sandi'i ra xá'a ndi'i ña nixiyo ñoyívi kuiya xina'á. <sup>7</sup> Chi Ndios chindú'u ra to'on ra ña kasa ndivi ra ña nika'an ra ndí ñoyívi yó'o xí'in ñoyívi nino ña xíto yó, ndáti ña ñii kivi ndi'i xá'a ña xí'in ño'o xixi. Saá koko ndi'i ña kuva'a kivi ña kasa nani Ndios xá'a kuachi nivi, ta nivi na on vása ni-xiin kandixa Ndios ko'on na noo xo'vi ní na ndi'i saá kivi.

<sup>8</sup> Ta ndó'ó, ñañani yó xí'in náki'va yó, na kí'vi ní ini i xíni i kúu ndó'ó; ta kóni i ña on nandoso ndó ndí noo Ndios ñii kivi yóo ña ndatán yóo ñii mil kuiya, ta ñii mil kuiya yóo ña ndatán yóo ñii kivi, saá yóo ña. <sup>9</sup> Vará sava nivi xáni sini na ndí Ndios kuáchi ní ra ña kasa ndivi ra ña nika'an ra, ta on sivi saá yóo ña. Ndixa Ndios ta ká'no ini kúu ra xí'in ndi'i nivi, on xijn ra ndi'i xá'a nda ñii nivi; chi ndáti ra ña ndi'i nivi nandikó ini na noo ña on vá'a ké'é na, ta va'a ná kí'vi na yichi noo xá'nda chiño ra.

<sup>10</sup> Ta kivi ña ndikó Jesucristo ñoyívi yó'o kuu ñii kivi ña on vása ndáti nivi, chi ndatán yóo ña kixa ñii takuí'ná ñoó ña kasa kuí'ná ra, saá koo kivi ndikó Jesucristo. Ta kivi kundivi ñayó'o saá, ndeé ní ni'i ta ndi'i xá'a ñoyívi nino ña xíto yó, ta ndi'i ña yóo ñoyívi nino kaa koko ndi'i ña xí'in



ño'o xíxi ta ndi'i xa'a ña, ta ñoyívi ñoo ño'o yó'o xí'in ndi'i ña yóo ñoo ña ñii ki'va saá kundo'o ña.

<sup>11</sup> Ta xa'a ña ndixa kúndaä ini yó ndí ndi'i xa'a ñoyívi, ta saá xíni ñó'ó vivíi kutaku yó ta taxi xí'in mii yó kasa ndivi yó ña kóni Ndios. <sup>12</sup> Ta xí'in ñasii ini yó xíni ñó'ó kundati yó kivi yó'o, ta chikaa yó ndee xí'in mii yó ña kasa ndivi yó ña kóni Ndios, ta saá kama kixaa kivi ña kasa nani ra xa'a kuachi nivi. Chi kivi yó'o ndi'i xa'a ñoyívi ñino ña xíto yó ta ndi'i ña kómí ña, koko ña xí'in ño'o xíxi ta ndi'i xa'a ña. <sup>13</sup> Ta mii yó ndáti yó ta ndáa ini yó Ndios ña kasa ndivi ra to'on ra ña nika'an ra ndí ndasa xaá ra ñoyívi ñino ña xíto yó, ta ndasa xaá ra ñoyívi ñoo ño'o yó'o. Ta ñaxaá kasa va'a Ndios yó'o kúu ñoo kutaku nivi na ndii níma, ta ndi'i saá kivi kasa ndivi na ña kóni Ndios.

<sup>14</sup> Ñakán, nañani yó xí'in náki'va yó, tá'an ndáti ndó ña kixaa kivi ña kundivi ñayó'o, chikaa ní ndó ndee xí'in mii ndó ña ndii ta vivíi kutaku ndó ñoo Ndios, ta ndixa koo va'a ini ndó chi xa va'a nákutá'an ndó xí'in Ndios. <sup>15</sup> Naká'an ndó ndí ta ká'no ini kúu Ndios, ta ndáti ra ña nandikó ini nivi ñoo ña on vá'a ké'é na xa'a ña kuchiño sakaku ra na. Ñii káchí ká'an to'on ña ñitaa ñani yó taPablo kivi ti'ví ra tutu ña ñixaa nda'a ndó; ñitaa ra tutu yó'o xí'in ñandíchi taxi Ndios nda'a ra. <sup>16</sup> Ñoo ñii ñii tutu ña ñitaa ñani yó taPablo ndato'on ra xí'in ndó xa'a ndi'i ñayó'o, ta ndixa yóo sava to'on ña ñitaa taPablo ña yo'vi ní kúndaä ini yó. Ta nivi na naa ini xí'in na sakán lo'o kuiti kándixa Jesucristo, ñayó'o násama na to'on yó'o, ta ñii ki'va saá násama na ndi'i to'on ña nika'an Ndios ña ñitaa nivi xina'á. Ta xa'a ña násama na to'on Ndios, nivi yó'o ko'on na ñoo xo'vi ní na ndi'i saá kivi.

<sup>17</sup> Ta ndó'ó, nañani yó xí'in náki'va yó, xa'a ña kúndaä ini ndó ñayó'o, xíni ñó'ó koto va'a ndó ña on taxi ndó sandá'ví ña on vá'a ndó'ó ña nakava ndó yichi nivi na on

vá'a, ta ni on sandakoo ndó ña kándixa ndino'o ini ndó Jesucristo. <sup>18</sup> Ndá víkà ndixa ñii ñii kivi xini ñó'ó chikaa ndó ndee ña koni va'a ka ndó Jesucristo, Taa taKá'no noo yó, ta kúu ra Taa ta Sakaku mii yó. Ñava'a ña xa taxi ra nda'a ndó chindeé ña ndó'ó ña ndino'o ka kutaku ndó ñii ñii kivi ndatán kóni mii ra. Ná kasa ká'no ní yó ra nda vitin tãnda ndi'i saá kivi ña vaxi. Saá ná koo ña.

Alacatlalzala Mixtec New Testament  
Mixtec, Alacatlalzala: Alacatlalzala Mixtec New Testament (New  
Testament+)

copyright © 2019 Wycliffe Bible Translators, Inc.

Language: Mixtec, Alacatlalzala

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 14 Jun 2022 from source files dated 13 Jun  
2022

a74bfb3f-bd55-5ab9-983e-8d19de48c198